

經

義

考

四十四

經義考卷二百六十二

秀水



男 昆田



逸經下

禮

逸篇

青史氏之記

右見大戴記保傅篇

世子之記

右見小戴記文王世子篇

王居明堂禮

句附

孟春出十五里迎歲

仲春帶以弓韞禮之祿下其子必得天材

季春出疫于郊以禳春氣

孟夏毋宿于國

仲秋九門磔禳以發陳氣禦止疾疫命庶民畢入于室日時
殺將至毋罹其災乃命國釀

季秋除道致梁以利農也

孟冬之月命農畢積聚繫收牛馬

季冬命國爲酒以合三族君子說小人樂

右三禮注

中霤禮

句附

以功布爲道布屬之几

右周禮注

凡祭五祀于廟用特牲有主有尸皆先設席于奧

祀尸之禮南面設主于戶內之西乃制脾及腎爲俎奠于主北又設盛于俎西祭黍稷祭肉祭醴皆三祭肉脾一腎再旣祭徹之更陳鼎俎設饌于筵前迎尸略于祭宗廟之儀

祀竈之禮先席于門之奧東面設主于竈陴乃制肺及心肝爲俎奠于主西又設盛于俎南亦祭黍三祭肺心肝各一祭醴二亦旣祭徹之更陳鼎俎設饌于筵前迎尸如祀尸之禮祀中霤之禮設主于牖下乃制心及肺肝爲俎其祭肉心肺肝各一他皆如祀尸之禮

祀門之禮北面設主于門左樞乃制肝及肺心爲俎奠于主南又設盛于俎東其他皆如祭竈之禮

行在廟門外之西爲轅壤厚二寸廣五尺輪四尺祀行之禮

北面設主于轅上乃制腎及脾爲俎奠于主南又設盛于俎
東祭肉腎一脾再其他皆如祀門之禮

以上皆中霤禮文

右月令注

禘于太廟禮

句附

禘于太廟之禮日用丁亥其昭尸穆尸其祝辭總稱孝子孝
孫皆升合于其祖

祫于太廟之禮毀廟之主升合食而立二尸

右吳氏儀禮逸經左傳杜預注

三正記

句附

正朔三而改文質再而復也質法天文法地也

天子龜長一尺二寸諸侯一尺大夫八寸士六寸

天子蓍長九尺諸侯七寸大夫五尺士三尺

灼龜以荆以火動龜不以水動著

右白虎通德論

江河淮濟爲四瀆瀆者通也所以通中國垢濁民陵居殖五穀也江者貢也珍物可貢獻也河者播爲九流出龍圖也淮者均均其務也濟者齊齊其度量也

右風俗通

大夫著五尺故立筮士之著三尺當坐筮

右儀禮疏

三王各以正月祭天南郊日用上辛

以上皆三正記文

右三禮義宗

瑞命篇

右論衡

本命篇

句附

男必三十而娶女必十五乃嫁

別名記

句附

司徒典民司空主地司馬順天

五人曰茂十人曰選百人曰俊千人曰英倍英曰賢萬人曰
傑萬傑曰聖

右白虎通德諭

盛德記

句附

明堂自古有之凡有九室室有四戶八牖共三十六戶七十
二牖以草蓋屋上圓下方所以朝諸侯其外有水名曰辟雍

右禮記疏

號諡記

右風俗通

親屬記

句附

男子先生稱兄後生稱弟女子先生爲姊後生爲妹父之昆弟不俱謂之世叔父之女昆弟俱謂之姑

王度記

句附

劉向曰王度記齊宣王時淳于髡等所說也

天子冢宰一人爵祿如天子之大夫

子男三卿一卿命于天子

臣致仕于君者養之以其祿之半

王者有象君之德燥不輕濕不重薄不撓廉不傷疵不掩是以人君寶之

反之以玦其不待放者亦與之物

天子鬯諸侯熏大夫芑蘭士蕝庶人艾

右白虎通德論

百戶爲里里一尹其祿如庶人在官者

右雜記注

大夫俟放于郊三年得環乃還得玦乃去

右曲禮疏

天子駕六馬諸侯駕四大夫三士二庶人一

以上皆王度記文

右漢書輿服志

五帝記

句附

立庠序之學則父子有親長幼有序

右周禮疏

王霸記

史繩祖曰周禮大司寇注引王霸記曰四面削其地又曰置之空墀之地又曰正之者殺之也又曰殘滅其爲惡又曰犯令者違命也陵政者輕政法不循也又曰悖人倫內外無以異於禽獸不可親百姓則誅滅去之凡六舉於司寇之注而不見於他書

右周禮注

按鄭康成注周禮引王霸記文乃大司馬之職史氏學齋佔俾乃以爲司寇誤矣

秋官篇

句附

韋昭曰周常官篇名

敵國賓至關尹以告行理以節逆之候人爲導卿出郊勞門尹除門宗祝執祀司里授館司徒具徒司空視塗司寇詰姦

虞人入材甸人積薪火師監燎水師監濯膳宰致餐廩人獻餼司馬陳芻工人展車

右國語

王史氏記

隋書王氏史氏記二十一篇

昭穆篇

句附

祀先賢於西學所以教諸侯之德也卽所以顯行國禮之處也

太學志

句附

禮士大夫學于聖人善人祭于明堂其無位者祭于太學

右蔡邕明堂論

禮外篇

句附

周時德澤治和蒿茂大以爲宮柱名曰蒿宮

右賈思勰齊民要術

遺句

子孫娶妻嫁女必擇孝弟世世有行義者是則子孫慈悌孝
愛不敢淫暴黨無不善三族輔之故鳳凰生而有仁義之性
虎狼生而有貪戾之心嗚呼戒之哉無養乳虎將禮天下

右逸大戴記

父召無諾君命召不俟駕

諸侯耕助以供粢盛夫人蠶繅以爲衣服

惟士無田則亦不祭

朝廷不厯位而相與言不踰階而相揖也

右孟子

距冬至日四十六日則天子迎春于東郊距邦八里堂高八尺堂階三等青稅八乘旗旄尙青田車載矛號曰助天生唱之以角舞之以羽翟此迎春之樂也自春分數四十六日則天子迎夏于南堂距邦七里堂高七尺堂階二等赤稅七乘旗旄尙赤田車載戟號曰助天養唱之以徵舞之以鼓鞀此迎夏之樂也自夏至數四十六日則天子迎秋于西堂距邦九里堂高九尺堂階九等白稅九乘旗旄尙白田車載兵號曰助天收唱之以商舞之以干戚此迎秋之樂也自秋分數四十六日則天子迎冬于北堂距邦六里堂高六尺堂階六等黑稅六乘旗旄尙黑田車載甲鐵鑿號曰助天誅唱之以羽舞之以干戈此迎冬之樂也

春則衣青衣佩青玉乘青輅駕青龍載青旗以迎春于東郊

居明堂左啟東戶夏則衣赤衣佩赤玉乘赤輅駕赤龍載赤旗以迎夏于南郊居明堂正廟啟南戶秋則衣白衣佩白玉乘白輅駕白駱載白旗以迎秋于西郊居明堂右啟西戶冬則衣黑衣佩黑玉乘黑輅駕鐵驪載黑旗以迎冬于北郊居明堂後廟啟北戶

右皇覽

兆于南郊所以定天位也祭地于泰折在北郊就陰位也

右漢書郊祀志

小學碾小節業小道焉大學碾大節業大道焉

毛奇齡曰賈誼新書引逸禮記文稱容經曰云云容經卽容禮後漢劉昆少習容禮也容禮當卽今之儀禮

右賈誼新書

珪博三寸刻上寸半厚半寸半珪爲璋方中圓外曰璧半璧曰璜圓中牙身外曰琮

孔穎達曰逸禮記文

右白虎通

王者必制巡狩之禮何尊天重民也所以五年一巡狩何五歲再開天道大備所以至四岳者盛德之山四方之中能興雲致雨也巡狩者何巡循也狩牧也爲天循行牧民也

右太平御覽

樂

遺句

土曰埙竹曰管皮曰鼓匏曰笙絲曰絃石曰磬金曰鐘木曰柷敔此謂八音也法易八卦也

壎坎音也管艮音也鼓震音也絃離音也鐘兌音也柷敔乾音也

右白虎通

磬前長三律二尺七寸後長二律尺八寸

右考工記疏

春秋左氏傳

遺句

歲祫及壇墠終禘及郊宗石室

毛奇齡曰見通典博士徐禪議按今左傳無此文豈左傳亦有遺句耶

論語

逸篇

問王

璠璣魯之寶玉也孔子曰美哉璠璣遠而望之煥若也近而視之瑟瑟也一則理勝一則孚勝

玉十謂之區治玉謂之琢亦謂之雕

璫玉色鮮白也瑩玉色也瑛玉光也瓊赤玉也璿瑾瑜美玉也璫三采玉也玲瓏璵璠璠玉聲也璵玉佩也璠充耳也璫玉飾以水藻也

右太平御覽

玉粲之璫兮其璫猛也

右說文

如玉之璫

右文選注